

栗香五筆

粟香五筆卷八

明桂王致吳三桂書 性因上孔定南王書

陸路赴俄日記 粵中客民

再記劉和州祠墓 謝公墩

愚園 劉阮重來

陳京卿書 嗇生居詩

燃松閣詩 鐵孟居士詩

寶山沈黃兩孝廉詩 秋夢庵詩

繆夏詞

冰紅詞

枌榆雅集

假山

管樹

化州橘考

陽羨茶考

木蘭

鹿角蘭

栗香五筆卷八

江陰 金武祥 淮生

明桂王致吳三桂書

曩見舊鈔本有順治十八年十一月前明永厯桂王  
朱由榔致書 大清平西王吳三桂曰將軍新朝之  
勲臣舊朝之重鎮也世膺爵秩藩封外疆烈皇帝之  
之於將軍可謂甚厚詎意國遭不造闖賊肆惡突入  
我京城殄滅我社稷逼死我先帝殺戮我人民將軍

志興楚國飲泣秦庭縞素視師提兵問罪當日之本  
衷原未泯也奈何憑藉大國狐假虎威外施復仇之  
虛名陰作新朝之佐命逆賊授首之後而北方一帶  
土宇非復先朝有也南方諸臣不忍宗社之顛覆迎  
立南陽何圖枕席未安干戈猝至宏光殄祀隆武就  
誅僕於此時幾不欲生猶暇爲宗社計乎諸臣強之  
再三謬承先緒自是以來一戰而楚地失再戰而東  
粵亡流離驚竄不可勝數幸李定國迎僕於貴州接

僕於南安自謂與人無患與世無爭矣而將軍忘君  
父之大德圖開創之豐功督師入滇覆我巢穴僕由  
是渡沙漠聯借緬人以固吾圉山遙水遠言笑誰歡  
祇益悲矣旣失世守之山河苟全性命于蠻服亦自  
幸矣乃將軍不避艱險請命遠來提數十萬之衆窮  
追逆旅之身何視天下之不廣哉豈天覆地載之中  
獨不容僕一人乎抑封王錫爵猶欲殲僕以徼功乎  
第思高皇帝櫛風沐雨之天下猶不能貽留片地以

爲將軍建功之所將軍旣毀我室猶欲取我子讀鵬  
鵬之章能不慘然心惻乎將軍猶是世祿之裔卽不  
爲僕憐獨不念先帝乎卽不念先帝獨不念二祖列  
宗乎卽不念二祖列宗獨不念已之祖若父乎不知  
大清何恩何德於將軍僕又何仇何怒於將軍也  
將軍自以爲智而適成其愚自以爲厚而反覺其薄  
奔祺而後史有傳書有載當以將軍爲何如人也僕  
今者兵衰力弱煢煢子立區區之命懸於將軍之手

矣如必欲僕首領則雖粉身碎骨血濺草萊所不敢  
辭若其轉禍爲福或以遐方寸土仍存三恪更非敢  
望儻得與太平草木同霑雨露於 聖朝僕縱有億  
萬之衆亦付於將軍惟將軍是命將軍臣事 大清  
亦可謂不忘故主之血食不負先帝之大德也惟冀  
裁之 武祥按桂王於順治十八年在緬之赭脛七  
月閒其從官盡爲緬人所殺是書未知出何人之手  
十二月初三日緬酋卽遣數十人至桂王所連坐擁



之去遂并其眷屬送三桂軍明年四月三桂殺之或  
謂三桂非殺桂王不足以昭擒渠服遠之功而堅  
大清之信任或又謂三桂非果戮力 大清也正欲  
藉興朝之力盡翦明宗枝葉而李定國白文選又皆  
其比肩委質之人勢難並立亦因此盡事殲除而後  
可營窟滇南不虞後患此皆三桂之隱情桂王區區  
尺一之書何足以激發其天良哉

劉獻廷廣陽雜記云吉坦然江甯人少隨其尊人扈

從永祿帝上雲南余問以滇中諸事坦然多目擊者  
永祿之自緬歸也吳三桂迎入坐輦中百姓縱觀之  
無不泣下沾襟永祿面如滿月須長過臍日角龍顏  
顧盼偉如也有滿洲人見之以爲眞天子遂有密謀  
以圖中興者事泄誅四十餘人焉予曰我向聞其人  
而遺其人之名先生猶憶得否坦然曰亦忘之矣然  
於法場上見爲首者長七尺餘形如虎豹皆言其膂  
力絕人騎射爲滿洲之冠永祿以此益不得更延時

日矣予曰聞帝崩之日天有風雷之變果然否曰吳三桂旣得密旨請帝於北門庫飲弈遂弑之百姓初不知也是日天極晴朗忽有黑雲起風雷交作城外里許有金汁湖在歸化寺側民儲水灌田者也有龍出於中蜿蜒升天頭角爪牙皆見衆方駭觀忽喧傳帝崩於北門備梓宮矣嗟乎人情天象如此而明竟亡天道果不可測也

康熙二十二年七月臺灣延平王鄭克塽降荆南甯

靜王朱術桂一門八口卽日自盡其同克塽降者九  
人魯王第八子朱柏舒城王孫朱慈燿荊州府甯靜  
王子朱儼鈐建昌府益王孫朱鎬宗室朱燾南昌府  
樂安王孫朱浚荊州巴東王孫朱江建昌府奉南王  
孫朱達原封建昌永厯改住廣東瀘溪王朱慈燾後  
朱江朱柏朱達朱儼鈐安插河南墾荒朱慈燾朱浚  
朱慈燿朱鎬安插山東墾荒亦見廣陽雜記

性因上孔定南王書

性因上孔定南書曰山僧梧水之罪人也承乏掖垣奉職無狀繫錦衣獄幾死杖下今夏編成清浪以道路之梗養疴招提皈命三寶四閱月於茲矣車騎至桂咫尺階前而不欲通蓋以罪人自處亦以廢人自棄又以世外之人自恕也今且有不得不一言於左右者故督師大學士瞿公總督學士張公皆山僧之友也已爲王所殺可謂得死所矣敵國之人勢不並存忠臣義士殺之而後成名兩公豈有遺憾於王卽

山僧亦豈有所私痛惜於兩公哉然聞遺骸未殯心  
竊惑之古之成大業者表揚忠節如出天性殺其身  
而敬且愛其人若唐高祖之於袁君素周世宗之於  
劉仁贍是也我明太祖之下金陵於元御史大夫福  
壽旣葬之矣復立祠以祀之其子犯法當死又曲法  
以赦之盛德美名于今爲烈至如元世祖祭文天祥  
伯顏恤汪立信之家豈非與中華禮教共植彝倫者  
耶山僧閒嘗論之衰國之忠臣與開國之功臣皆受

命於天同分厯柱之任天下無功臣則世道不平天下無忠臣則人心不正事雖殊軌道實同源兩公一死之重豈輕於百戰之勲哉王旣已殺之則忠臣之忠見功臣之功亦見矣此又王見德之時也請具衣冠爲兩公殮瞿公幼子尤宜存恤張公無嗣益可哀矜並當擇付親知歸葬故里則仁義之譽王且播於無窮矣如其不爾亦許山僧領屍隨緣藁葬揆之情理亦未相妨豈可使忠義之士如盜賊寇讐必滅其

家狼藉其肢體而後快於心耶夫殺兩公于生者王  
所自以爲功也禮兩公於死者天下後世所共以王  
爲德也物外閒人不辭多口旣爲生死交情不忍嘿  
嘿然於我佛冤親平等之心王者澤及枯骨之政聖  
人維護綱常之教一舉而三善備矣山僧跛不能履  
敢遣侍者以書獻敬候斧鉞惟王圖之

按金先生諱堡字道隱浙江杭州府仁和縣人崇禎  
庚辰進士初授臨清知州後爲行朝給諫以言事杖



成清浪衛桂林旣下定南欲官之辭不受乃度爲僧  
適留守瞿公式耜總督張公同敝殉節暴屍衢路師  
致書定南請收葬兩公骸骨定南從之師法名今釋  
號澹歸又號性因自稱借山野衲又稱茅垞衲僧往  
來廬山丹崖間以終 又按諸書言瞿忠宣之得斂  
也由於楊高士之哭請高士名菽字頤甫吳江平望  
人曾與瞿公偕至廣西其哭請斂屍一事有陸清獻  
楊高士詩序及山人錢雲所撰楊頤甫傳皆詳載之

及見王應奎柳南續筆云當高士哭請時性因亦上書遣侍者將投書遇高士知已得請遂不果上而此書持論之正措詞之妙固有足傳者 又按常州趙止庵名繼鼎與道隱同舉進士道隱出世有二子祝髮長子從父入山止庵曰道隱清風峻節第可了一身奈何令金氏血祚盡入空門力招長子金世鎬飲食教誨越四年世鎬青衿還鄉道隱贈止庵詩云無故老兄添一累有緣稚子足三冬阿誰落得便宜去

長嘯松濤萬壑風見趙彪詔毘陵見聞隨筆

趙隨筆又附棲霞三僧節略云古崧姓趙氏名鳴陽  
江南吳江人明時孝廉能文以救鄰鋪獲罪戍雲南  
前丙辰會試斷么絕六之謠其已事也國亡遁迹桂  
嶺三十餘年孫延齡逆命召之辭與渾融性因爲友  
渾融楚之沅州人父張楚珩崇禎初柳州馬平縣尹  
渾融之避地入粵以其父故有恩於狼獾諸夷也性  
因依渾融以死古崧不知所終

陸路赴俄日記

陸路赴俄日記一卷后汝鈞撰汝鈞直隸人同治閒以供事隨劾剛侍郎使西獨從陸路而行四月十二日由京起程出張家口經內外蒙古五月二十一日至庫倫二十九日至恰克圖卽與俄國交界一望平坦中俄賣買營相隔不過百步旣無山河分割亦無關卡攔阻惟須至俄之邊界官處請護照免單耳七月十一日抵俄之比德堡其書係鈔本紀載甚畧姑

錄數條於此

自張家口雇車車甚高大其制係連車轆車尾俱作車蓬從旁開門如船槲然車蓬油飾甚嚴風雨不透係送至庫倫便當另雇駝隻因內蒙人不識外蒙路徑也

按瀛環志畧由察哈爾至庫倫中梗瀚海一道汝鈞此行細勘其地盡屬沙漠無片土水則處處皆有但地廣人稀懶於淘井以致乏水草亦處處有之卽陷

沙中亦均有草根因近年荒旱不生耳莫測瀚海之所在庫倫懋生號王竹坡掌櫃久歷蒙地二十餘年因詢其瀚海之說據稱走大西路出嘉峪關則有之尙不甚寬約二三百里其極寬處八百里走張家口及西路之歸化城來庫均未之遇也詢以究竟起於何所亦云不知又詢其聞此地無滴水寸草草雖無法可施水則沙中自有何不挑之使宣卽掘井亦可得飲據稱曾迷途於其地備水飲盡乃掘沙之低窪

東莞縣志 卷五  
者其底如白石嘗之如鹽識者謂卽石鹽卽得水亦何能飲哉

恰克圖俄國邊界官法富司詢云由此往俄京其帶盤費若干答以盧布五百元伊云自此至京萬三千餘里如何敷用必須千五百元當代作電報致貴國駐京公館滙兌盧布千元不過三四日可滙到云

### 粵東客民

粵中客民寄籍各邑東莞新安新甯高明先有學額

載學政全書此外如番禺歸善電白化州石城遂溪  
徐聞合浦靈山欽州儋州臨高陽山鎮平皆同治光  
緒年間始行取進學額赤溪則專設同知以治之以  
新甯縣學額撥入其繁衍日盛可見矣而莫詳客民  
之始於何年來自何地惟開平縣志云前明永樂間  
降胡安置河間樂昌二府英宗北狩將騷動于忠肅  
奏遣其有名號者隨征湖廣兩粵諸寇事平奏留各  
處及楊信民中丞撫粵嘉應州土寇亂以客勇討平



之卽安插嘉應州 國朝乾隆閒由嘉屬遷恩平高明及鶴山新興開平高要等縣以其自外來故曰客初爲土著佃頗勤耕作生齒日繁咸豐閒土客仇殺客民推武舉馬從龍及貢生張寶銘首先發難屢起屢滅同治閒始安定云

再記劉師勇祠墓

余輯劉師勇事畧所採書凡九種近見明謝應芳龜巢集姚嘗傳有云師勇總戍兵出鎮江口至此句亦

可憐人余復言之學使惓次遠侍郎卽寄題祠聯云  
石難填海同志三忠溯義師曾駐吾鄉白叟能談青  
史事戟已沈沙獨留孤冢知毅魄樂依斯土丹心長  
照赤城霞嗣試士以擬重修赤溪銅鼓山宋和州防  
禦使劉公廟碑記命題有番禺張生錫麟順德盧生  
寶葵駢文甚佳篇長不備錄

謝公墩

金陵半山寺爲王介甫舊宅其東巖爲謝公墩介甫

詩我名公字偶相同我屋公墩在眼中所謂爭墩者是也中有小澗終日泉聲淙淙然蓋鍾山燕雀湖水流入青溪處舊有魁時若將軍聯云泉聲常在耳山色不離門薛慰農院長聯云鍾阜割秀青溪分源咫尺接層城歎禁苑全虛尙留此寺謝傅棋枰荆公第宅去來皆幻迹問孤墩終古究屬何人近年鄭蘇龕觀察聯云往事重論懷古誰含出世想昔賢不見聽泉我愛在山聲跋云癸未秋日游半山寺客或言謝

王事者徐胤之曰此間泉聲亦清越可憇客悟謝王  
有知如此嘲諷何此跋及聯頗超妙乙酉年謝子受  
觀察築屋於此爲觴詠地聯云墩本吾家勝蹟從來  
稱太傅宅由我造半山莫更讓荆公似又蹈爭墩之  
習余昔游此有詩云一墩自占江山秀千載常懷晉  
宋人慰翁以爲亦可作楹聯云

愚園

丁酉仲秋游金陵劉聚卿觀察

世珩

招飲愚園其地

爲徐中山王西園遺蹟有水石之勝游者以爲前半園似滄浪亭後半園似獅子林園有張乘崖醉石劉季高題名云劉季高甫徘徊其旁紹興丁丑七月乙未十六字余卽席成齊天樂詞云竭來城市山林地依稀六朝烟水疊石皴雲分池浣月并作新秋涼翠蘭亭已矣問獅子滄浪較量誰似更築層樓峯巒四望極天際西園尙存舊址滄桑棋局換興廢如此巷訪烏衣渡尋桃葉勝蹟今看餘幾剗苔覓字有前

度劉郎再來還記引我徘徊倚蒼巖一醉聚卿和云

問他金碧樓臺地蕭寥一池秋水羃歷簾櫳臙脂婉

嬾亂撲遙峯晴翠垂崖往矣比吳下阿瑛風流奚似

寫影青娥

愚園池爲六朝影娥池

紅牆隔住淺清際

浮山海

門宅址

君家

滄溟擎檝返探勝來此墨客揮犀景廬

隨筆

君刻栗香室叢書栗香隨筆大箸卷帙舛舛

束筍牛腰凡幾毘陵舊

德借吹暖春風倚聲刊記

繆荃風丈刻常州詞錄云先生搜輯者大半

暨

浦歸颿覓江湖再醉

劉阮重來

萍鄉劉金門先生鳳誥乾隆己酉探花年甫三十以  
吏部侍郎出爲浙江學政其時阮文達重撫浙江閱  
兵溫處適先生按臨台州兩公同年友善約事竣游  
天台有戊辰三月七日甯海行館次阮同年詩云文  
旆戎旌兩度開紗籠盼到使君同懷人恰好天台路  
又喜劉來待阮來及游山有劉阮重來四字之額爲  
言官風聞以劉阮重到天台跡涉輕佻二公皆獲咎

先生復因科場事遣戍旋復編修

陳京卿書

徐固卿孝廉出示陳蘭甫京卿致其尊人子遠太守  
各函皆東塾集所未載者有云自宋以來學術迭變  
固由風氣之轉移亦由門戶之爭競有爭競故有興  
衰然門戶之爭總不出孔門之四科德行道學傳也  
言語文苑傳也文學儒林傳也政事則大而將相小  
而循吏傳是也四科之人皆天下所不可無故孔門



兼收而不偏廢尤不交爭爭則有勝負有勝負則必偏廢偏廢則天下受其害矣近著四科論一篇以明此意欲學者各因所長以成其學然言語政事文學固斷不可無德行而德行言語政事又斷不能不由學而入德行文學卽宋學漢學兩派也此兩派者其末流之弊皆入於無用然使四科之人不交爭而偏廢則空山之中有一二腐儒拱手而談理學埋頭而治章句皆大有益於世無用卽是有用惟獨以一端

倡率天下而靡然從之則或爲空疏或爲繁碎不但  
無用且有害矣又云小學者古人十五歲以前之學  
也十五歲以前旣明乎此故十五而入大學三年通  
一藝三十而六藝皆通也百年來儒者之治小學爲  
唐宋諸儒所不及然所著書往往精深浩博但可爲  
知者道中人之資不能領解讀不終卷而置之矣澧  
嘗謂近儒之講小學乃眞白首而不能窮者非古人  
所謂小學也以漢儒之學之盛而班孟堅尙以爲祿

利使然今求祿利者既不藉此而稍稍有志者讀此等書又苦不得其門而入此學術所以不振雖以乾嘉中大師數輩倡明之而今已漸衰也夫學問之事莫難於入門既入其門則稍有智慧者必知其有味而不肯遽舍在乎老師宿儒引而入之入門者多則此道日昌其能深造者爲通儒不能深造者亦知其大畧而不至於茫昧而文學彬彬矣故精深浩博之書反不如啟蒙之書之爲功較大而獨恨百年以來

未有著此等書者也又云近時碩學魁儒著書精博者多而可以開初學耳目者甚少是以新學小生一見古書便驚若望洋無由尋其門徑澧前數年卽欲與子琴大令同著小學之書極精深而出以極簡極淺庶幾可以開發初學其實所謂小學者正是如此能成此等書其功正不小耳

齋生居詩

寶山李齋生先生保泰以乾隆庚子進士就揚州府

學教授歷三十年地處脂膏廉隅自勵高文廣譽遠  
近響風內擢國子博士未上事引年退卜居崑山所  
著詩古文三十卷亂後散佚近文孫吉人明經寶生  
以搜存古文五十九首郵示余錄副將刊行之詩則  
僅存數十首樸厚淵懿上法浣花得孫口占云自我  
上溯父祖曾四世皆不及見祖我年二十六舉兒記  
得歡顏動我父襁褓含飴始弄孫伶仃一綫延門戶  
今年兒亦及我年再世添丁若有數田園五畝尙無

成圖書萬卷儻可主旣難庇子焉庇孫甯知爲鼠與  
爲虎呶啞笑憶髯蘇詩無災無難愚且魯文章本自  
慚到漑公卿安用祝虞詡他時指點大父行奕葉衰  
宗留薄祜催人老景感侵尋蹉跎那許崦嵫補祗愁  
抱子曰未知爲人作父曾不努寄羽吉姪云狂憶吾  
家阮飄零近若何薊門一夜雨夢逐雁聲多萬里烽  
烟隔頻年詩酒過吾衰最牢落身世惜蹉跎陳烈婦  
詩云白水心同潔滄波效命辰蛟龍應避窟風雨欲

迷津偕老緣何促同歸願竟伸誰甘稱後死不作未  
亡人寄月村弟用蘇韻云東風無力鬪芳春夢醒猶  
餘舊日身一第貧家眞賴汝十年倦客故依人欲謀  
去就應無計敢說文章自有神安得淨根皈佛火萬  
緣回首證前因初歸崑山寓齋感賦云小草從知出  
處輕倦游且擬事歸耕空憐松菊荒蕪久偶託萍蓬  
羈旅成夢去未知斜日影潮來還識故園聲蜉蝣身  
世渾無賴老向齋鹽了一生

燃松閣存稿

江甯劉雨生司馬言昔朱蘭坡宮贊爲鍾山院長時  
所器賞者有二顧蓋秋碧子巽兩先生也皆以諸生  
終秋碧先生名槐三嘗有柴米油鹽醬醋茶七律猶  
記醋詩起句云書生風味美人心末句云我亦醅雞  
感身世半瓶羞澀到而今又嘗過金陵聞見其舊宅  
門聯云得過且過日子半通不通秀才是牢騷以風  
趣出之者子巽先生之孫卽漁溪通政秋碧先生之



後則不可知矣云云余近得秋碧先生燃松閣存稿  
鈔本一卷工力深至讀題周竹田芥圃詩鈔一首可  
以見之詩云周郎詩格清於水脫手彈丸無不美清  
俊時登庾鮑堂高奇擬薄曹劉壘我更獻君芻蕘愚  
願君還讀千卷書上之瑚璉珍國器次亦淹雅稱通  
儒剛日讀經柔讀史開卷有益良不誣試觀古人著  
書者穿穴各有真工夫造物愛名不輕錫會須全力  
相委輸西山丁穴恣漁獵曹倉鄴架供馳驅龍湫湧

地噴百斛珠光照市傾五都譬如仙人養丹藥烹鍊  
須向陰陽鑪傾筐倒筐靡不有馭風叱霆皆自如可  
知一字不著處雲漿化液蒸醍醐否則體弱文不稱  
伯仁有腹徒空疏風雲月露豔雕刻圖書沒骨安貴  
乎聞君型家頗孝友天倫歡樂怡慈母卽此能過鐘  
鼎榮莫教徒恃風華首況君未及相如貧喜無齋蠶  
淹頭巾一紙可叩子雲戶千軸當貯曹氏困嗟余卻  
受讀書累青衫潦倒心如醉汲古空教說線裝爭光

未肯偕魑魅請君更束交游牒休作雲中驚蛺蝶交  
游都堪累性情人多那盡稱豪傑好向嬋媛讀異書  
他年同訂名山業

鐵孟居士詩

近見鈔本儀徵汪大竹部郎全泰

乾隆甲子兄弟同榜舉人

鐵孟

居士詩一卷蓋錄自鴛湖王惜庵所輯友聲集中初

入土州云絕域衣冠少羈州版籍稀波聲聞鼻飲

鼻飲

蟹星影見頭飛

飛頭

竹釜炊蛇熟銀沙飼蠱肥天南

風俗異歌詠覺全非剝塞云荒城連嶺去飛觀接江  
高毒雨升龍鬬蠻雲偃象交山民淘古辣谿婦射思  
牢尙有侏離舞黃公咒赤刀上林縣云晨光滿山縣  
春氣有谿霞過水波羅樹當船吉貝花暖風嘯鬼蜚  
腥雨戲天鰕更向蠻村宿泥鑪試洞茶方虛谷謂中  
唐以後人多善言風土此三首寫粵西殊異之景不  
讓柳州

寶山沈黃兩孝廉詩

寶山陳君同叔來函云吾鄉沈夢塘先生諱學淵嘉慶庚午舉人著有桂畱山房集十二卷其松風堂懷李忠定公云斷蘚碧埋昭武字亂山青似靖康年渡江懷古云量到江心天水碧飛來山色酒盃青夾馬營懷古云但聞母后傳遺詔可奈先君問藐孤其餘佳聯甚多外簾雜詠點名云冠頂先叨一粒紅滿堂都是應聲蟲全詩不能盡記先生應孫平叔官保之聘與修福建省志著有入閩金石考藏於家又黃秋

坪先生諱瓚原名河瑞嘉慶癸酉舉人李喬生郡博  
之婿其都門秋思云久矣欲歸無再計偶然小別已  
三年又一聯云畫史胸中先有竹騷人賦裏只生蘭  
其詩祇有選本刻入白沙四孝廉集中先生係忠端  
公尊素之後人忠端與江陰繆文貞李忠毅同時被  
難其季子名梧避居吾邑之白沙爲張姓句讀師後  
贅以爲婿冒姓張入 本朝復姓黃今忠端公遺像  
尙存

秋夢庵詩

余甲午重至粵東嶺南耆舊中往還最稔時與爲文  
酒之讌者惟葉蘭臺太史衍蘭已記其贈詞於第五  
卷矣嘗爲余言僕秋夢庵詞已付梓惟詩所存無多  
不另刻當附君五筆以傳故每爲余書扇必錄其詩  
都門雜詩云衣滿緇塵鬢滿霜輪蹄得得爲誰忙艱  
難楮葉三年刻冷淡梅花十月香貧女無媒羞自獻  
才人已老不容狂黃金合鑄相思淚半化紅冰半海

棠苦說鷓鴣戀一枝側身萍海歎希微蘭情幽豔騷  
人賦花樣單寒寡女機無可奈何牛馬走不如歸去  
鱖魚肥笠簷簑袂平生夢猶有鷗盟舊釣磯退食從  
容跨紫騮金鼇煙柳鏡中收天魔夜舞全無地帝子  
晨裝尙有樓瓊島暮霞仙塔迴珠江明月畫船秋故  
園夢繞花深處萬戶千門已倦遊秋暮阿連一紙書  
問余何事不歸與爲言風雪長安慣翻使烟蘿舊約  
虛繡隴但能同買犢金門誰肯久懸魚羅敷告訴梅



花說終遣仙茆卜隱居蓋太史由丙辰庶常散館分  
戶部值樞垣最久嗣卽假歸不出主講越華書院四  
詩作於都門其知幾勇退情見乎詞如此余最愛其  
題紅拂圖絕句云李郎虬客本奇才直得紅妝俊眼  
開可惜當時未親見太原公子襦裘來余歸里逾年  
由張玉珊大令處寄到訃函知太史於七月二十四  
日捐館言猶在耳亟錄數章以答知已於地下云

太史壽七十五精神步履不減少年偶患痰濕誤投

補劑遂至罔效病中猶賦病黃詩四律尤想見其神  
明不亂也詩云吟到秋花瘦骨單居然黃面學瞿曇  
陡驚雲物來微菌那有瓊貽遠贈柑守日何曾人瑞  
見題碑祇覺色絲慙忽然欲作游蜂想斜抱花枝笑  
不堪龍袍豈合亂加身祇有彈琴樹下聲幾度鵲啼  
埋土恨頻年鵬吹說風情赤松何處來尋石靈藥無  
由徧覓精惟願願嘛全剝去好憑阿嬭護長生轉緣  
迴時劇可憐竟同梅雨夏初天吟成豆葉詞人曲說

到槐花舉子顛牛世青燈叢卷裏忽來白葦亂茅前  
更無粉額親磨墨替寫河流遠上篇由來我是土搏  
人難說精金鑄島身一領青衫仍鷓鴣子卅年烏帽抗  
蹄塵藁舍定覺心中苦梁熟空教夢裏真雲海更無  
登覽興詩吟山谷劇傷神

繆夏二君詞

丁酉秋薄游金陵主繆筱珊編修下榻鍾山講舍唱  
和頗多筱珊尤好詞輯刻同郡自 國朝以來詞三

十卷曰常州詞錄八邑文獻賴是以存亦盛業也其  
自著亦多佳者齊天樂雨過錫山云九龍山色空濛  
裏亂烟織成新暝湖雨抽絲嶺雲擘絮鷓鴣地白鋪千  
頃天公做冷漸鄉夢催回酒潮逼醒隔岸漁家菰蒲  
深處響笳簫 滄江驚又歲晚銜泥同燕子巢幕難  
穩一樣清游鐙前酒底換了舊時情性凋年急景恁  
轉瞬陰晴也無憑準夜半楓橋聽鐘聲猛省金菊對  
芙蓉送春云柳眼微舒蕉心盡吐斷腸人在天涯悵

繡旛難護羯鼓頻撾遼陽信斷東風緊漸吹散鬢霧  
衫霞相思紅豆嵌來入骨是也非耶 管甚春深春  
淺把春光一半分送人家更買春開宴重撥琵琶鶯  
鶯燕咤眞多事有誰能收拾芳華可憐杜牧綠陰如  
水尙逐香車送春詞作於乙未年頗有寄意筱珊舊  
藏改七薌繪雙紅豆仕女圖卷余爲題高陽臺詞云  
絳樹齊聲瓊葩儷影是誰熨出靈根南國春回幾番  
瘦了詩魂殷勤欲寄相思字怕重提絮果萍因祝東

君好與歡來莫共愁生

年來習氣消花絮

定庵句便

千回百轉底事千卿倦眼重揩忽教振觸瑤情覷他

一掬珊瑚淚感風懷老去蘭成喚真真玉台燈前記

可分明

燭影下開玉合背人暗數竹垞詠紅豆詞也

同邑夏閏枝編修孫桐亦工詩詞夜飛鵲偕菽風過

望亭風雨竟夕挑燈情話不勝身世之感繪同舟聽

雨圖紀之詞云西風暗吹雨黃葉聲邊孤櫂冷泊吳

煙津橋星火半明滅羈人相對遲眠瀟瀟又喧幾陣

正山鐘攪斷野柝催闌清愁萬點任蓬窗一晌無言  
休歎轉蓬身世偏共卧滄江經歲經年今夕茫茫  
荒浦雲淒水濶誰更鳴舷擁衾翦燭想蘆中夢影都  
寒怕棲鳥驚起明朝攬鏡換了朱顏南浦菰風遠自  
武昌郵示月湖看雨新詞渺渺秋懷溢於言表時吳  
中新結漚隱詞社冷境囑于殆如響應次韻寄懷不  
自覺其言之淒異也詞云澤畔共行吟又幾時冷入  
露蓮殘粉風雨雁來天江潭句遙識漢南秋訊盈盈

衣帶料常被鄉心句引兩家荒逕笑無主煙蘿飄零  
訴盡 軟紅舊夢如塵便不問銅駝青衫淚迸黃葉  
數聲蟬恨無端作去就梧宮寒信菰蒲覓侶祇鷗鷺  
酬將吟興吳楓驛瞑盼極浦霜帆爪痕來印與筱珊  
可爲笙磬同音矣閨枝曾和予冰泉詩丙申重晤於  
吳門時將入都以山塘秋泛圖出示囑題爲填洞仙  
歌云當年劫火把塵囂浣盡虎阜從今露眞面泛山  
塘七里聯襟題襟圖畫裏領取秋光無限 我來重



載酒纔續前游又唱驪歌各留戀梅雨聽連宵新漲  
吳波較別意是誰深淺憑寄語春明舊吟朋道落拓  
相如卅年游倦

冰紅詞

吾鄉蔣鹿潭嵯尹以詞名咸同間有水雲樓詞四卷  
余復刻其古近體詩數十首並爲作傳其猶子溥卿  
大令名玉棧竹林繼起亦工詩詞有冰紅詞四卷好  
事近云疏雨焙茶天深院晝長人靜閒煞坐花雙燕

說斜陽紅冷

大隄飛絮已無多相思逐萍梗留取

半池淒碧認江南春影虞美人蕪湖道中見楊花云

晴綿如雪東風緊颭破春波影怪他只解撲青衫不

肯替人扶夢到江南

溟濛遮斷天涯路似勸征帆

住相逢底用惜飄零縱使沾泥猶未化浮萍八聲甘

州春草云襯平蕪彌望翠雲涼柔芳妒羅裙趁三分

酥雨一分殘雪喚醒春魂千里晴光澹沲生意滿閒

門憂思無埋處老我王孫

斷送繁華今古問江關

渺邈誰種愁根弔玉鈿遺跡空付采香人更休過北  
却山下背夕陽多少可兒墳興亡恨聞銷磨盡都化  
烟痕高陽臺玉屏舟中清明云杏酪融香餠膠粘恨  
閑愁料理春人過眼韶光天涯時字逡巡柳陰濃似  
江南岸記柔荑親翦涼雲丙戌清明後一日有江漢之行天涯爲客自此始矣  
最難忘梨雪紅闌燕子朱門深闥定有登樓感對  
長隄芳草空怨王孫落魄而今花枝應笑離羣遊絲  
已礙還鄉夢又東風捲起珠塵正無寥蓬背蕭蕭細

雨黃昏丙申夏日與晤於吳門爲余題永泉唱和集  
徵招云雅游重訂驂鸞錄蒼梧野陰搖暮萬感鬱騷  
心況雞鳴風雨林泉誰是主且招我忘機鷗鷺凍綠  
浮杯墜紅飄幘亂山如俎 泉蠹漫亭荒聲仙去殘  
題更無尋處翰墨古緣深剔落花重補詩情渾漫與  
儘贏得蘭成詞賦紫簫喚楚怨淒迷和沈寥鴻語  
薄卿苦壺詩鈔所存較詞爲少而鍊意鍊句憂憂獨  
造春感云驚塵眯幽矚春味掩酸懷餞臘一月殍穉

柳長於釵天地寶一怒噫氣掀荒蕪頽碧慘不蘇下  
有沈憂埋新勝託虛獲前賞嗟暫乖愿蠲蓬棘心一  
肆土木骸冬夜謠云篆痕瘦縮香不溫冰奩冷閣青  
娥魂銅虬凍折夜光澀枯淚滴斷聲聞根夢覺寒機  
驚鴈語蠶親抽絲續幽緒停辛伫苦那忍眠留取君  
歸作春紵送勒大元俠歸豫章云秋氣晚蕭騷霜晴  
征鴈高西風吹落葉相送到江皋別恨牽柔櫓新寒  
敵緼袍平生感風義明發首重搔寶應道中云奔流

一束障湖門暮色荒寒涵氣昏墮枕殘鐘烟外寺打  
蓬孱葉雨中村天高鴻鴈聲聞斷地坼蛟鼉窟宅尊  
明日露筋祠下過擬酤清醕薦蘭蓀歲暮感懷云剝  
復幾深不可尋元冥默默悶窮會張峯老鵲作人欬  
擁鼻寒狸有佛心妖彗動搖光閃睽欠天凌厲氣蕭  
森愁邊白日堂堂去負手聊爲不子吟溥卿近復著  
南北史宮詞六卷皆自註之

粉榆雅集

余丙申後里居月必至蘭城爲文酒之會寓讀雪山  
房最久成冰泉唱和閨集一卷以戊戌閨上已讌集  
於此用冰泉修禊舊韻因以名集也白雲溪南有史  
氏望雲水榭前則清虛主人幹甫刺史後其令嗣季  
育茂才均風雅好客與之迭爲賓主丙申暮春余招  
同人小集水榭劉光珊明經成洞仙歌詞云園林大  
好有詩人爲主燕子當年借棲處繞回廊一帶盡是  
垂楊猶記得幾度尋芳來去 故鄉纔握手旋唱驢

歌悔不萍蹤莫相聚準擬舉離觴底事無情早做就  
漫天風雨拌別後相思鎮無聊賸冷醉閒吟倚闌敲  
句呂幼舫中翰成憶舊游詞用劉贈惲韻云問青尊  
仁月白韶歆風幾輩疏狂望美人天末把雲愁海思  
自寫年光當筵盡逢俊侶詞筆豔何郎更瘦碧微吟  
翦紅小譜纔罷評量未問瘦碧詞  
季广翦紅詞巖廊正多事便  
痛飲高歌也沒歡腸只二三舊雨且彈碁花午說劍  
宵長人生但拚行樂肯負手中觴待卜筮雲溪他時



東坡全集卷之三  
同占鷗鷺鄉幼齡後又有洞仙歌和光珊云最難文字飲昨夜雲溪百里應喧德星聚可想見當日盍簪之樂矣

惲氏靜園昔名東園池臺結構相傳爲王石谷惲南田所合成主人孟樂編修屢招游讌介弟季庵孝廉年少工詩詞見贈四律並和冰泉長短句余贈詩有一榜先聲年正少諸昆後勁爾多才之句光珊有贈季庵詞云記涼迎竹外笑索梅邊容住詩狂十載重

來後縱亭臺易主，楊柳春光燕歸似。曾相識前度老  
劉郎，瞰古樹猶存閒花，獨豔儘思量。回廊共攜  
手，羨張緒風流，別有詞腸。柳亦如人瘦，恁柔絲牽惹  
一樣情長。待招舊時吟侶，同醉紫霞觴。奈我已無家  
羈縻不定，忘故鄉。季庵之兄瑾叔部郎以長歌見貽  
季申太守叔坤孝廉和冰泉詩詞均爲彙梓焉。

同人見和詩詞亦有撰楹聯爲贈者七言如汪子淵  
編修云：隨筆續編耆舊傳，愛廬待賦歸來辭。張筱圃

庶常云靈運詩篇工述祖康成經學喜傳孫吳昌頤  
大令云冰井詩題篋中集雲林詞和江南春八言如  
劉棻真編修云天祿琳琅異書坐擁風流儒雅吾鄉  
人師又云角巾偶歸暨陽湖畔高歌未已白石山中  
李經畦刺史云交滿四海樂道人善胸羅萬卷不矜  
其才丁酉歲余於舍後闢一室顏曰陶廬自出園學  
使汪子淵編修鄭叔問孝廉均贈題額光珊明經撰  
聯子淵篆書云賦詩常憶陶彭澤著書欲過洪容齋

江陰邑城舊家池館惟陳氏適園經亂未壞主人燮  
卿主政游歷海外歸養疴不出以書畫自娛常招余  
園居贈以絕句云三十三峯翠色浮江城如畫足句  
畱此來喜下陳蕃楊大好園林卧更遊

### 假山

曩過吳門晤曲園太史詢粵中假山以爲英石非真  
并著之九九消夏錄不知假山有二一則如吳綺嶺  
南風物記所論脫沙產自連州及英德縣如浚洸等

處均有之

余客江西湖南均見此種不  
僅六觀齋所云衢州拱溪也

水沙凝結嵌

空玲瓏亦間有以人力疏鑿補合者一則英德所產  
之石其色黑其質堅兼皺透瘦之妙購爲清供需價  
每至數十百金其零星小石嘗以紅毛泥黏砌成之  
繚曲奇峭具峯巒洞穴之狀二者均復飾以樓閣亭  
榭及人物禽獸之屬皆用陶埴雕鏤之大小相稱位  
置天然並用水法作爲瀑布飛流直下淙淙如奏琴  
筑又雜種竹木之最穉者蒼苔碧蔭尤蔥蒨有致惟

英后不及脫沙之澤潤能引水耳桂林張后鄰太守  
嘗傲其鄉山水手疊之有尺許至數尺者一庭之中  
恍羅干岩萬壑眞老杜所謂望中疑在野幽處欲生  
雲也余贈以詩云我愛佳山水曾游嶺西路羨君生  
是邦邱壑胸中具縱橫十笏地蒼翠攬無數天工雜  
人巧羅列各成趣隱山六洞開獨秀一峯踞徘徊疊  
綵旁髣髴還珠處誰登碧虛亭好問花橋渡岑危綴  
樓閣巖幽藹雲霧澄澄滄波涵淙淙飛瀑注

下置水  
盆時有

瀑泉機注秦松與漢柏縮此徑寸樹逕曲如螺旋人細如  
蟻附直疑取九華攜向壺中住維君日坐對似到故  
鄉去惟余亦舊游重來憶前度相看都不厭肅拜祇  
生慕聊作蠅頭書摩崖戲題句

管樹

余四筆卷一載舊寓廣州糧道解未見管樹嗣知在  
解後院西老幹喬柯廣蔭畝許其時疑爲古榕廣東  
新語云葉開則色殷紅望之如花初發如筆管粵人

因名爲管樹高州志云茂名呼爲壓筆吳川呼爲雅  
翠他書記古度木亦復相似屈翁山詩云少參堂側  
有老樹似榕非榕榕所寓葉葉含苞如木筆葉開忽  
似花爭吐卽詠管樹也明李時言名默官廣東僉事  
卽居此廨暇則著書管樹之下所撰孤樹哀談十卷  
著錄 四庫千頃堂書目誤以爲趙可與作屈翁山  
王漁洋翁覃溪皆以默是書撰於管樹之下  
翁書管  
作梳  
居官之所以樹名書均可爲據藥洲九曜第一石督



學吳鵬題名有同建安李默載酒來觀云云蓋嘉靖時同官於粵後默累官吏部尙書以不阿嚴嵩下獄忿恨卒因論管樹井詳考之

### 化州橘考

化州橘紅相傳仙人羅辯種橘於石龍之腹其實非橘皮厚肉酸不中食其皮釐爲五片七片治痰症如神阮文達化州橘記云按志橘紅出化州者佳化州四鄉多橘以城內者爲佳城內多橘以及聞州衙隸

鼓者爲佳蘇澤堂前祇兩樹耳尤推賴氏園中老樹  
一株爲至佳老樹久枯其根下生新樹今數十年高  
丈許故復稱老樹賴氏守此世爲業買者就樹摘之  
以示其真花多實少之年一枝享千錢雖官不能攫  
之園中近老樹者數十株亦佳惟老樹皮紅有白毛  
戟手香烈而味辛識者入手能辨之夫蘇澤堂橘官  
物也徵之者多州牧不暇給長官若買之則官不受  
價否則攫而已余於庚辰十一月過化州知賴園之

橘可買也命僕人入園訪老樹賴叟曰老樹賣已盡  
惟零丁數枚矣卽以數千錢摘之賴叟其古橘中人  
歟或云化城地中多矇石蘇澤堂當石之上而賴園  
老樹根下矇石之力或更巨物性所秉或亦然歟後  
光緒間重修高州府志吳川吳宣崇書記後云阮文  
達之至化州也將市橘賴園時園橘罄矣賴叟取平  
定大黃洞之橘綴之樹杪文達至園丁從樹杪下之  
文達據以爲記意曰吾正名辨物侔色揣稱洵足窮

其形而發其秘矣嗟夫烏知此白毛戟手者乃去州城百五六十里外之僞物耶夫化州橘所以能治痰者礫石氣耳礫石自寶山徑賴園達州署則凡寶山賴園州署諸橘功用一也蘇澤堂老樹見用最先故得名最早其全體實滑澤無毫毛寶山賴園各樹皆細毫柔饒乾則色黃而香烈無異也名曰紅者取其似耳總之非平定橘比自文達是記出天下之人盡捨柔毫者而購白毛戟手者於是平定之橘走天下

而賴園失利嗟夫賴叟恃其譎智希一日之利詎知  
後日之大不利耶文達負其才學據身親目擊之橘  
筆之爲記詎知天下之人舍眞橘而市僞橘又此記  
誤之耶

化州解蘇澤堂題額之義人常疑爲東坡遺澤不知  
坡公未至化州宋史蘇轍傳紹聖三年謫化州別駕  
雷州安置是蘇澤二字當指穎濱非坡公也因記橘  
附考之

陽羨茶考

近歲鄉居欲購陽羨茶

亦名芥茶又名芥片

每不可得稽之宜

興荆溪志及陳貞慧秋園雜佩所載茶事皆畧而不

詳曩所刻叢書中有周高起洞山芥茶系云兩峯相

阻介就夷曠者人呼爲芥

履其地始知古人制字有義今字書但注云山名耳

云有八十八處

如羅芥了頭芥留青芥茅山芥之類

茶有四品又有不

入品者周所著在明代恐今昔所產不同晤荆溪周

志伊明經德咸出示陽羨茶考一篇亟備錄之文云

爾雅苦茶郭注云樹小似梔葉冬生葉可煮作羹飲  
今呼早採者爲茶晚取者爲茗一名荈蓋質言之則  
曰茶文言之則爲茗爲荈析言之則爲茶爲茗爲荈  
渾言之則無別至陸羽茶經始改茶爲茶茶之產陽  
羨者統名爲界茶茶之緣始唐以前無可考其擅勝  
者有四曰離墨茶山以仙人鍾離墨得道於此得名  
山巔產茶芳香冠他種俗所稱離墨紅筋茶也爲陽  
羨茶真種一曰茗嶺茶山以產茶而名茗嶺之足曰

盧芥芥片之美陸鴻漸所稱圈嶺茶者是也嶺有柳  
宿廟宿爲茶神俗誤呼爲劉秀廟採茗者祀之其茶  
較龍墨種爲尤勝時稱廟前茶爲陽羨茶之上品此  
二山之有茶或且在唐以前又有南嶽茶產於銅官  
山麓之南嶽寺前眞珠泉出焉唐時寺中有稠錫和  
尚者嘗欲以此泉烹桐廬茶旋有白蛇銜茶子置泉  
側取種蒔之遂滋蔓遍山麓其味絕佳自是易泉名  
爲卓錫而陽羨之茶交推南嶽一時爭致官府徵需



無藝寺僧苦之自題壁間云官符星火催新焙反使  
山僧怨白蛇又有產自唐貢山者山名亦以貢茶而  
得臨罨畫溪唐時御史大夫李栖筠守常州有山僧  
獻陽羨佳茗陸鴻漸以爲芳香冠絕他境可供尙方  
栖筠從之遂置茶舍歲貢茶萬兩陽羨貢茶於是濫  
觴杜牧有題茶山詩十四韻而茗嶺之芥片亦同入  
貢麻宋元明因之 國朝湯翰春詞云芥裏人家漾  
碧烟香聞十里焙茶天縣符昨日新頒到上供雲腴

揀廟前此指茗嶺茶而言也其貢茶之品目與多寡迭有增減元初設茶園提領所於張清明時改爲批驗茶引所宣德年兼置茶院於城邑每歲穀雨前一日縣官祭山神開園擇取入簍各茶戶納辦由縣起程赴司府驗明候布政司拜表發解交禮部例有定限其鄭重也如此及入 本朝止貢芽茶一百斤革除民解專委張渚湖汊兩司輪年領解焉按陽羨之界茶古昔盛時以茗嶺廟前茶爲上品唐貢茶次之

皆見賞於鴻漸山人而列諸常供離墨茶又次之南  
嶽茶爲異種其後四處之茶日衰而種藝之區日廣  
遂不復有各處品目但概以陽羨山茶爲名寢至道  
咸年間浙西溫台二州山人流寓荆溪山谷中以種  
山芋爲生稍稍植茶歲就蕃滋以芋爲糧以茶爲息  
古昔四處之名茶絕無而僅有而山民之種茶品味  
亦日薄劣蓋古茶由地氣所鍾今茶由人力所成形  
質一而秉受不同所得稱爲陽羨名茶者惟茗嶺茶

株尙偶有一二其他深谷中自產之茶名曰野山茶  
雅越常品向之充貢者蓋似此其種時之茶則但以  
穀雨前採者爲頭茶爲上品雨後採者爲二茶爲中  
品三茶爲常品過此則等諸自檜下矣自經粵匪之  
亂山谷蕭條溫台客民重複引至種植茶株倍徙於  
山芋而野山茶之生益尠山人事工煩而傭值昂搜  
尋野產每不可得故野山遂爲罕有之珍其爲茶也  
細粗並蓄不加揀選視夫雨前芽茶之稱雀舌號銀

針名毛尖者若不登品而其味厚其色碧其香清三  
美畢具特不知較諸古之紅筋柳宿唐貢蛇銜諸茶  
其低昂爲何如而古時諸茶例夫今之雨前細芽其  
美劣又何如設仍有稱茶神如鴻漸者在焉當必能  
辨之也獨慨中興以來荆溪之茶產擅利於一方邇  
歲山民率多拔茶而時鶯粟夫甘藷可以充飢苦茶  
亦足供日用鶯粟則爲害人之物舍養人之物而易  
以害人玩物產之遷流能無慨世運之興替也乎

## 木蘭

余陶廬雜憶詩云姹紫嫣紅開遍了幽香纔放木蘭  
花此花他處罕有而羣芳譜別有木蘭一種與此殊  
異偶閱嘉興錢警石先生甘泉鄉人稿在海甯州學  
舍有樹蘭詩序云廣業堂前有花樹一本暮春時細  
朶叢開花葉一色其香若蘭而更幽花瓣若梅而四  
出微尖心若小石榴而白土人名曰淨瓶花亦以花  
心所以而名也然花譜未載他處不多見應筇湖檢

羣芳譜目爲樹蘭云詩又有結實甘而小之句注云  
秋深實如金彈篇長不備錄余按廣州有樹蘭花如  
珠蘭而枝幹有高丈許者亦係木本以名此花尙恐  
未確木蘭樹蘭蓋隨地以意名之亦猶之名爲淨瓶  
花耳

### 鹿角蘭

張石鄰太守贈鹿角蘭蘭無葉其枝青而圓槎枒四  
出以其枝似鹿角花似蘭故名鹿角蘭又稱珊瑚蘭

一莖數花瓣細而心鉅秋冬間始開根附於石以鐵  
絲絡之懸於空中曾倚水龍吟調詠之云伊尼舊解  
斑茸何年空谷成香草紫茄暗換青莖漸茁叢生多  
少石瘦縈根泉清濯幹挂來烟篠任籬圍鹿眼座揮  
塵尾論臭味誰同調 漫擬珊瑚鐵網吐琪葩乍疑  
瓊島觸憐獬豸憎憑瘼犬幽芳獨抱蕉夢醒餘蕙風  
轉候菊殘梅早好招邀仙客援琴再鼓譜猗猗操  
鹿茸以色如紫茄者爲上開元  
遺事明皇獲白鹿名曰仙客  
此蘭罕見前人亦無



詠者時乙未季秋蓋有所託興云